



Бүгін - Конституция күні

Сыр бойы

№131
(20405)



Қызылорда облыстық қоғамдық-саяси газет • 1929 жылдың 1 шілдесінен шығады

30 тамыз, сейсенбі 2022 жыл

e-mail: syrboyi@yandex.kz / www.syrboyi.kz

www.facebook.com/syrboyi.kz/

www.instagram.com/syrboyi_kz

https://twitter.com/syrboyi

t.me/syrboyi_kz

3 Жаңа баптар жарқын өзгерістерге негіз қалайды



4 Білім – сарқылмайтын байлық



5 Уақытыңды ұрлатпа



6 Кырық жылға созылған қасірет



ПРЕЗИДЕНТ

«МҰНДАЙ ҚАСІРЕТ ЕШҚАШАН ҚАЙТАЛАНБАУЫ КЕРЕК»



Қазақстан ядролық қауіпсіздік қағидаттарын әрдайым берік ұстанады. Бұл туралы ҚР Президенті Қасым-Жомарт Тоқаев Twitter-де жазды.

«Бүгін – Ядролық сынақтарға қарсы халықаралық іс-қимыл күні. Бұл күннің бүкіл адамзат үшін мән-маңызы айрықша. Қасиетті қазак жері атом сынағынан орасан зор зардап шекті. Мұндай қасірет ешқашан қайталанбауы керек. Қазақстан ядролық қауіпсіздік қағидаттарын әрдайым берік ұстанады» деді Мемлекет басшысы.

ҮКІМЕТ

ЖАУАПТЫ МАУСЫМ МІНДЕТТЕРІ

27 тамыз күні ҚР Премьер-Министрі Әлихан Смайыловтың төрағалығымен Үкімет отырысы өтті. Селекторлық жиында Қазақстанның 2023-2027 жылдарға арналған әлеуметтік-экономикалық даму болжамы және 2023-2025 жылдарға арналған республикалық бюджетті қалыптастыру жөніндегі заң жобалары қаралды. Сондай-ақ, қант өндірісін дамыту туралы айтылды.

Отырысқа министрлер мен өңір әкімдері қатысып, жауапты сала басшылары баяндама жасады.

Үкімет басшысы экономиканың нақты секторында өңдеу өнеркәсібін дамыту, бизнесті қолдау, көлік инфрақұрылымын дамыту және газдандыру негізгі бағыттар екенін жеткізді.

Селекторлық жиыннан кейін облыс әкімі Нұрлыбек Нәлібаев өнеркәсіп өндірісі көлемін арттыру, экономикалық өсімді қалыптастыру бағытында қала, аудан әкімдері мен басқарма басшыларына бірқатар тапсырмалар жүктелді.

Жыл қорытындысымен өнеркәсіп өндірісінде кем дегенде 1 пайыздық өсімді қамтамасыз ету бойынша шаралар қабылдауды тапсырамын. Ол үшін облыс төңірегінде жұмыс жасап тұрған кәсіпорындарға өнім шығаруды арттыру бойынша қолданыстағы заң аясында жәрдемдесу керек.

Сонымен бірге шыны зауытында өнім шығаруды жеделдету және жаңа өндіріс көздерін ашу бағытында өңірге инвестиция тарту жұмыстарын жандандыру қажет, – деді облыс әкімі.

2-бет

САЛТАНАТТЫ ЖИЫН



Суреттерді түсірген Б.ЕСЖАНОВ

Ата Заңды ардақтау – әрбір азаматтың парызы

Биыл ел Конституциясының қабылданғанына 27 жыл. Мемлекет үшін айтулы мереке әрбір қазақстандық үшін айрықша маңызға ие. Сыр елінде де Ата Заңды ұлықтаған мерейлі сәт Н.Бекежанов атындағы қазақ академиялық музыкалық драма театрында өтті. Салтанатты жиында Мемлекеттік Ту аясында еліміздің Әнұраны шырқалды.

Сб Ғазиза ӘБІЛДА,
«Сыр бойы»

Облыс әкімі Нұрлыбек Нәлібаев барша Сыр жұртшылығын маңызы зор мемлекеттік мереке – Қазақстан Республикасының Конституциясы күнімен құттықтады.

– Ата Заңды ардақтау – болашаққа батыл қадам басқан егемен еліміздегі әрбір азаматтың асыл парызы. Конституция – қағаз жүзіндегі құжат емес, ол – елдің, халықтың, әрбір азаматтың өмір сүру ережесі, мемлекеттіліктің іргесін бекітіп, халықаралық кеңістікте ұдайы өркендеуін қамтамасыз ететін негіз. 1995 жылы бүкілхалықтық референдумда қабылданған Ата Заң халықтың бірлігін, қоғамдық және рухани келісін нығайтып, егемендік пен саяси тұрақтылықтың кепілі болғаны белгілі.

Тәуелсіздік жылдарында құқықтық жүйенің тиімділігінің арқасында еліміз әлеуметтік-экономикалық дамуда әлеуетті табыстарға қол жеткізіп, іргелі мемлекеттер қатарына қосылды. Ел Конституциясы Қазақстанның табыстылығы мен одан әрі өркендеуінің нышанына айналды.

Әлемде заңға бағынбайтын ел жоқ. Өйткені, Конституция мемлекеттіліктің маңызды белгісі, саяси және құқықтық құжаты болып табылады. Сондықтан, ол қоғам үздіксіз дамыған сайын уақыт пен заман талабына қарай өзгеріп, жанарады. Жаңа стратегиялық мақсаттар мен заманауи жаһандық сын-қатерлер қоғам тарапынан уақытылы және тиімді жауап қайтаруды қажет етеді. Бұл өз

орайында мықты институттарға негізделген, теңдестірілген және тиімді билік жүйесін талап етеді, – деді облыс әкімі.

Осы жылы еліміздің саяси жүйесінде ауқымды өзгерістер орын алып, халқымыз дамудың жаңа жолын таңдады. Мемлекет басшысы ел болашағына негіз болатын салмағы басым саяси реформалар жариялады. Дәлірек айтсақ, биылғы 5 маусымда республикалық референдум өткізіліп, еліміздің Ата Заңының 33 бабына 56 өзгерту енгізілді. Аймақ басшысы Ата Заңға енгізілген бұл өзгерістер жанару, жаңғыру жолындағы Жаңа Қазақстанның заманауи талабына жауап беретіндей қалыптасқанын атап өтті.

– Әлемде Конституциясы жоқ мемлекеттер де бар деп әрдайым Ұлыбритания мен Араб елдерін мысал етіп жүрміз. Бірі «төрт мыңнан астам заңды тұтастай алғанда бір Конституция» деп есептесе, бірі шарият заңдарына сүйенеді. Сондай-ақ, әлемдік мемлекеттерде жазылған немесе жазылмаған заңдар болады.

2-бет



ОБЛЫС ӘКІМІНІҢ ҚҰТТЫҚТАУЫ

Құрметті жерлестер! Баршаңызды Конституция күнімен шын жүректен құттықтаймын!

Конституция – заң үстемдігінің берік орнап, қоғамның ілгері дамуына қызмет ететін айрықша құжат.

Ата Заңды ардақтау – болашаққа батыл қадам басқан егемен еліміздегі әрбір азаматтың асыл парызы.

Мемлекет басшысы Қасым-Жомарт Кемелұлы Тоқаев: «Ата Заң ел бірлігін және адамның ар-құрметі мен абыройына қол сұғуға болмайтын негіздеп, кемсітудің кез келген түріне тыйым салу арқылы ұлттымызды ұйыстырады. Осы басты ұстанымдар баға жетпес байлығымыз – ішкі саяси тұрақтылықты қамтамасыз етеді» деп бұл күннің айрықша маңызына ие екенін жеткізді.

Биыл Президент ел дамуы үшін мәні зор саяси реформалар жариялап, Жаңа Қазақстан идеясын өмірге әкелді. Оның өзегі – әділдік пен заң үстемдігі.

Осы ұстаным аясында 5 маусымда республикалық референдум өткізіліп, Конституцияның 33 бабына 56 өзгерту енгізілді. Ел үшін маңызды күнде жерлестеріміз бірлік танытып, орнықты қадам жасады. Нәтижесінде, облысымыз референдум көрсеткіші бойынша өңірлер арасында алдыңғы үштікке енді.

Қадірлі сырбойлылар!

Мемлекетіміз үшін аса маңызды мерекеде баршаныңа денсаулық, отбасыларыңызға амандық, бақ-береке тілеймін! Тәуелсіз еліміз өркендей берсін!

Нұрлыбек НӘЛІБАЕВ,
облыс әкімі

САПАР

Аймақ дамуы ауылдан басталады



Ауыл әлеуетін көтеру – ел экономикасының басым бағыты. Қаладағы халықтың жағдайы ғана емес, ауыл тұрғындарының жай-күйі де мемлекет деңгейін бағамдауға жол ашады. Сондықтан елді мекендердің инфрақұрылымын дамыту, әлеуметтік-спорттық нысандар санын арттыру негізгі мақсатқа айналды. Осы орайда облыс әкімі Нұрлыбек Нәлібаев жұмыс сапарымен Сырдария ауданының Бесарық ауылына барып, бірқатар нысанды аралады.

Сб Актілек БІТІМБАЙ,
«Сыр бойы»

2-бет

ЕГІН-2022

«Таңның» өнімі ТМД елдерінде



Суреттерді түсірген Н.НҮРЖАУБАЙ

Сырдағы дикандар егінге орақ салғалы бір апта болды. Егінші қауымның ала жазғы еңбегі ақталар күн алыс емес. Өңірдегі шаруашылықтар су тапшылығын аз сезінбесе де, бұл мәселе өте мұқият болғанға ұқсайды.

Бүгінде күріш атыздарынан суын тартып, Сырдың басты дақылын жинауға кіріскендердің бірі – Жалағаш ауданындағы «Таң» ауылына қарасты «Таң ЛТД» серіктестігі. 3000 гектарға жуық егін еккен шаруашылық осылай биылғы дөңге орақ салды.

Сб Ержан ҚОЖАС,
«Сыр бойы»

6-бет



Ядролық сынақ тоқтаған күн

Облыс орталығындағы «Тағзым» алаңында Семей ядролық полигонының жабылуы күніне байланысты апаттан қаза тапқандарды еске алу іс-шарасы өтті.

Сб Аружан ЕРАЛЫ,
«Сыр бойы»

Оған облыс әкімі аппаратының басшысы Шахмардан Байманов, облыстық ардагерлер кеңесінің төрағасы Серік Дүйсенбаев және «Невада-Семей» қоғамдық бірлестігінің жетекшісі Сәбит Ыдырысұлы қатысты.

Тарихтан белгілі 29 тамыз – Тәуелсіз Қазақстанның өз еркімен атом қару-жарағынан бас тартып, әлемге өзінің бейбітшілігінің паш еткен күні. Семей атом сынағының 1991 жылдың 29 тамызында жабылуы еліміз үшін төндесі жоқ қуаныш болды. Бұл шешім әлі күнге дейін өміршеңдігін жоғалтқан емес. Ядролық сынақты тоқтату арқылы Қазақстан өз имиджін қалыптастырды.

– Тәуелсіздікпен бірге келген жетістіктеріміздің бірі Семей атом полигонының жабылуы еді. Тарихқа көз салсақ, сынақ полигоны Кеңес одағының аса маңызды стратегиялық объектісі болғаны белгілі. 18 млн гектар жерге орнатылған полигонда 456 ядролық және термоядролық жарылыс жасалған. Олардың 116-сы ашық түрде



болды. Полигонда әуеде және жер бетінде сынақтан өткізілген ядролық зарядтардың жалпы қуаты 1945 жылы Хиросимаға тасталған атом бомбасының қуатынан бірнеше есе көп болған. Халықтың басына түскен нәубетке бей-жай қарай алмаған азаматтар 1989 жылы қоғам қайраткері Олжас Сүлейменовтің бастауымен алғашқы митинг өткізді. Осылайша 1991 жылы Қазақстан атом бомбасынан өз еркімен бас

тартқан алғашқы мемлекет болып тарихта қалды. Еліміз аман, жұртымыз тыныш, Тәуелсіздігіміз тұғырлы болғай, – деді Ш.Байманов.

Іс-шараға жиналғандар Семей ядролық полигонында қаза тапқан қандастарымыздың рухына бас иіп, оларды бір сәт үнсіздікпен еске алды. Соңында құрбандардың рухына құран бағышталып, ескерткішке гүл шоқтары қойылды.



«Таңның» өнімі ТМД елдерінде

Орақ салу рәсіміне шаруашылық еңбеккерлерінен бөлек, Жалағаш ауданында өтіп жатқан облыстық ардагерлер ұйымының көшпелі семинарына келген қариялар қатысты. Әр өңірден келген қонақтар серіктестік төрағасы Имамзада Шағыртаев бастаған егіншілерге ақ батасын беріп, күзгі өнімнің мол болуына тілек білдірді.

«Таң ЛТД» ЖШС 2003 жылы құрылған. Ауылмен аттас серіктестік көп жылдан бері күрші егіп келеді.

– Бүгін дикан қауым үшін ерекше күн. Өйткені, жаз бойы бейнет қылып, сол еңбектің нәтижесін көрер күнге жақын қалдық. Биыл шаруашылық бойынша егілген күршітен орташа есеппен әр гектардан 60-70 центнерден аламыз деген жоспар бар. Ал жыл сайын біздің ақталған күрші Қазақстаннан бөлек, көрші мемлекеттерге де экспортта-

лады. Шаруашылықтың техникалық өнбегі 2011 жылдан бастап жаңартылды. Соңғы технологияларды пайдалана отырып, күрші сапасын арттыру жұмыстары да қолға алынған. Ал әлеуметтік жұмыстарға келер болсақ, ауыл ішіне керекті нысандар салуға шаруашылық қолдауы әрдайым жалғасын табууда, – дейді серіктестік төрағасы Имамзада Шағыртаев.

2016 жылдан бастап жеке қаражаты есебінен «Таң» елді мекенін абаттандыру және тұрғындарды әлеуметтік қамсыздандыру бағытына 701 млн теңге қаржы бөлген. Мысалы, 100 орындық «Таң бөбегі» балабақшасы мен мешіт қайта жаңғыртылып, жаңа спорт кешені пайдалануға берілген. Биыл аталған спорт кешенін ұлғайту мақсатында тамыз айында 150 орындық жаңа ғимараттың іргетасы қаланған. Бұл нысан келесі жылы бітеді. Өз өнімimizi

шығару мақсатымен ет өңдеу цехын да іске қостық. Бұдан өзге ауылды абаттандыру-көркейту жұмыстарына да жиі қолдау көрсетіп жүр.

Сондай-ақ серіктестік 2019 жылы тұқым шаруашылығы статусын алды. Екі мың тоннадан астам тұқым дайындаса, соның жартысын өзге ауданды шаруашылықтар сатып алады. Бізбен кездескен төрағаның сенімді өкілі Сәкен Шағыртаев жұмыстарын баян етті.

– Шаруашылық «Таң» ауылының өзінен бөлек, Мырзабай ахун, «Мақпалкөл», көрші Қармақшыдағы «Ақжар» ауылына да инвестор есебінде күрші екті. Қаржы салып, осы ауылдағы тұрғындардың жұмысқа орналасуына ықпал жасап отыр. Қазір күзгі жиын-терім басталды. Күршінің шығымы да жақсы. Өртаптандыру мақсатында бақша өсіреміз. Мал азығына жоңышқамыз да бар. Жыл

сайын техника жаңартылып отыр. Жалпы 2011 жылдан бері ауыл шаруашылығы машиналарын алып келеміз. Жаңа технология, заманауи шаруашылық көліктерінің бізге үлкен көмегі бар. Осының арқасында серіктестік жоғары өнім алып, облыста алдыңғы орындан көрініп келеді. Технология дегенмен де, күршіке тәжірибелі маман қажет. Өз басым шаруашылықтағы еңбеккерлерді мақтан тұтамын, – дейді ол.

Сәкен Шағыртаевтың айтуынша, егін даласынан жиылған күрші облыс орталығына кетеді. Өйткені, күрші ақтайтын зауыты сонда. Неге десек, тапсырыс берушілердің көбі дайын өнімді үлкен қала орталығынан іздейді екен. Жергілікті жерге келуге жол шығындарын ауырсынатыны тағы бар. Қазір «Таң ЛТД» шаруашылығының өнімдері Ресей, Қырғызстан, Өзбекстан сияқты көршілес республикаларға да жіберіледі.

1-бет

Осы жылдың 15 қыркүйегіне дейін салық төлеушілер бақылау-касса машиналарының бағдарламасын жаңартуы қажет

2022 жылы деректерді тіркеу және (немесе) беру функциясы бар бақылау-касса машиналарын қолдану тәртібіне (Салық кодексінің 166-бабына) өзгерістер мен толықтырулар енгізілді.

«Бақылау-касса машиналарын қолдану мәселелері бойынша» жұмыс тобы шеңберінде бақылау-касса машиналарының әзірлеушілерімен және салық деректер операторларымен бірлесіп бақылау-касса машиналарымен ақшалай есеп айырысулар туралы мәліметтер беру бойынша оператордың серверіне деректерді берудің бірыңғай Хаттамасы жаңартылып бекітілді.

Осыған байланысты, модельдері бақылау-касса машиналарының мемлекеттік тізімінен енгізілген, деректерді тіркеу және беру функциясы бар бақылау-касса машиналарын қолданатын барлық кәсіпкерлерге 2022 жылғы 15 қыркүйекке дейінгі мерзімде өздерінің жұмыс істеп тұрған бақылау-касса машиналарын қайта бағдарламалау қажет!

Назар аударыңыз! 15 қыркүйектен бастап, 2.0.2 басқа Хаттамаларға салық деректер операторлары қолдау көрсетпейді! Осыған



Осы жылдың 15 қыркүйегіне дейін салық төлеушілер бақылау-касса машиналарының бағдарламасын жаңартуы қажет

байланысты, барлығына бақылау-касса машиналарын 2.0.2 хаттама нұсқасына дейін алдын ала жаңартуға кеңес береміз.

Салық кодексінің 171-бабына сәйкес, тауарларды өткізу, жұмыстарды орындау, қызметтерді көрсету кезінде жүзеге асырылатын ақшалай есеп айырысулар туралы деректерді тіркеу және (немесе) беру функция-

сы бар бақылау-касса машиналарының мәліметтерін қабылдау, сақтау бойынша қызметтер көрсетуді, сондай-ақ оларды салық органдарына беруді фискалдық деректер операторы жүргізеді.

«Бақылау-касса машиналарын қолданудың кейбір мәселелері туралы» Қазақстан Республикасының Қаржы министрінің бұйрығына сәйкес бақылау-касса машиналары фискалдық деректер операторының серверіне мемлекеттік кірістер органдарына ақшалай есеп айырысулар туралы мәліметтерді беруді қамтамасыз ететін техникалық талаптарға және сәйкестік нысанына, бақылау-касса машиналарының техникалық талаптарына сәйкес ақшалай есеп айырысулар туралы мәліметтерді береді.

Егер 2022 жылғы 15 қыркүйекке дейінгі мерзімде салық төлеушілер бақылау-касса машиналарының бағдарламасын жаңартпаса, фискалдық деректер операторлары ондай бақылау-касса машиналарына техникалық қолдау көрсетпейді.

Қызылорда қаласы бойынша Мемлекеттік кірістер басқармасы

Меншік иесі

СЫР МЕДИЯ

жауапкершілігі шектеулі серіктестігі

БАС ДИРЕКТОР

Аманжол ОҒАРБАЕВ

қабылдау бөлмесі тел/факс: 8/7242/ 70-00-36, 40-11-10 (1002)

БАС РЕДАКТОР

Қуат ШАРАБИДИНОВ

қабылдау бөлмесі – тел: 8/7242/ 40-02-17, 40-11-10 (1007)

Бас редактордың орынбасары – 40-11-10 (1053)
Жауапты хатшы – 70-00-81 (1037)

Бөлімдер:

руханият және ақпарат – 40-11-10 (1039, 1040)

экономика – 40-11-10 (1038, 1033)

әлеумет және саясат – 40-11-10 (1034)

жарнама – 70-00-52, 40-11-10 (1058)

есеп-қисап – 70-00-39, 70-00-38

компьютер орталығы және корректорлар – 40-11-10 (1036, 1035)

Қызылорда облыстық «Сыр бойы» газеті

ҚР СТ ISO 9001-2016 (ISO 9001:2015)

«Сапа менеджменті жүйелері» талаптарына сәйкес КЗ.4310318.07.03.01178 нөмірімен сертификатталған. Авторларға қаламақы тапсырыс бойынша төленеді, қолжазба өңделеді және қайтарылмайды. Жариялымдар газеттің түпкілікті көзқарасын білдірмейді. «АҚ» - ақылы қызмет. Жарнама мазмұнына жарнама беруші жауапты.

Газет аптасына 3 рет (сейсенбі, бейсенбі, сенбі күндері) шығады.

Газет Қазақстан Республикасының Мәдениет және ақпарат министрлігі Ақпарат және мұрағат комитетінде тіркелген. Тіркеу куәлігі №12993-Г, 27.08.2012 ж.

Газет редакцияның компьютер орталығында теріліп, беттеліп, «ASU» баспа үйі» ЖШС сенімгерлік басқаруындағы «Сыр медиа» ЖШС баспаханасында басылды. Тел.: 8/7242/ 40-06-68. Газеттің таралымы бойынша 8/7242/ 70-14-08 телефон нөміріне хабарласуға болады.